

671.1323
083
16

文獻略三

人物篇下

文苑
節婦

隱逸
烈婦

藝術
貞女

方外
孝女

宦者
閨秀

大年
賢母

寓賢

著述篇

雄縣新志

第六冊

雄縣新志

文獻略

人物篇下

清文苑

王忻字濟似號茨菴喬棟次子事父母以孝聞生而穎異端嚴九歲能屬文讀尚書卽通曉大義及長博覽經史肆力於詩古文詞下筆數千言立就高陽孫少師深器之妻以孫女隨副使官福建事無大小悉與參決吏胥稱神明焉母韓恭人病焚香虔禱請以身代巡撫蕭奕輔將以孝薦力辭之從晉江黃東崖相國游極被器重副使備衢與部下陳臥子吳幼洪輩交所學

益進後與吳梅村學士遇出所著述吳極推重乙酉避兵於浙
干戈擾攘猶與諸名士結社賦詩其五日句云孟嘗父子生前
誤屈子君臣死後明人服其典麗是歲副使有雲南之命未之
官流寇破武昌諸郡副使死之所悲痛致疾自以忠臣之子決
意隱逸丙午移居六合之西圩或有勸之仕者不應因作拂志
篇千餘言著悔詩六首以見志子企靖弱冠成進士自有傳企
堂舉人兩女俱諳文詞一堂倡和無虛日以此忘貧居西圩三
十年始還里雖貧困彌甚而誦讀不輟作辨道篇以明朱陸之
分持議甚精所著有越嘯近言西圩草茨菴前後集歸來稿病
餘錄凡百餘篇所編輯者有史存史抄歷朝詩抄又數百卷藏

於家康熙四十七年祀鄉賢府志入理學

王企堂字紀遠號雪坡康熙四十四年舉人官江蘇荆溪知縣有雪坡詩稿四卷史孫述爲之序云邑侯王公莅荆一載以太翁年近期頤請改教歸養出詩稿相示意則溫厚和平格則謹嚴雄渾一切風雲月露之態不足當其一映云

馬之驕字旻徠順治甲申拔貢是時國初以推知用不就改教職除灤州訓導歷元城教諭廣平教授江都管河主簿起授山東壽張縣主簿帶管東阿河工駐張秋鎮制行醇謹善爲詩格律大雅卓然成家著有易鬯詩鬯四書戡毛詩元韻算數新箋琴音新表古調堂詩文集三亭詞歷代詩防當代詩防張秋志

養正集雄縣新城二志

王字澤字陶六錦衣百戶學典之子棄襲職不就矢志誦讀弱冠游泮尋食餼九戰棘場不利康熙癸巳年六十三膺歲薦貢於廷壬子歲選威縣訓導時年八十二猶精神王長策馬赴官課士恤貧修齋舍增祀牲勒石紀績越六年告歸又二年卒年八十九著有青氈吟吟嚙集畿輔詩傳著錄府志入文苑

馬其字雲亭號南溟乾隆庚辰副榜乙酉舉人官元城教諭武英殿中書舍人工詩不事雕鏤直抒胸臆有雲亭詩一卷畿輔詩傳著錄府志入文苑

董其英字雲亭開口村人道光丁卯欽賜舉人戊辰會試欽賜

國子監學正辛未會試欽賜助教頗善書法其聯邀睿賞皆以此尤工行書迄今人得其片紙隻字猶奉爲至寶

袁琥字繡堂龍灣村人咸豐辛酉舉人歷任廣昌教諭趙州通州昌平州等處學正年五十四卒於昌平任所琥性至孝本生父卒終三年喪然後起復又性好義凡有利於鄉里者身任之而不恤鄉人額其門曰愛深桑梓家居授徒多士自遠方至歷掌雄文及蘇家橋書院勤於課士日閱課文數十卷皆嚴爲點竄以勞成疾猶不倦及爲學官尤以教授爲己任一時賢士多從之游經其陶成者往往掇巍科以去著有毛詩述義藏於家張懋昭字著彝倉後街人歲貢生隱居教授不慕紛華自署其

居曰避俗山房日以臨池爲事凡祠廟碑碣扁榜多假其椽筆至今片紙流傳人尤珍惜焉晚年爲文昌宮義學山長終日危坐教誨不倦光緒初年卒年七十有三

周監易字子占大營村人同治庚午舉人工制舉文光緒初年邑令趙公映辰聘主雄文書院每一藝出人爭傳頌之歷署大名鄉學教諭開州縣學教諭天津府學教授終於阜城教諭年六十五歲著有尙友堂文稿

呂樂和字竹軒一鋪人性倜儻精篆刻善畫不古不俗工四體書不拘拘於成法嘗爲人摹泐墓志古甌上手自椎搨入魏碑中幾亂真時鬻書畫自給而飲酒自若不憂道亦不憂貧有名

士風民國某年八十餘卒

許鴻綬字密齋原名鴻藻光緒丙子舉人世居傅家營村少穎悟弱冠登賢書屢上春官不第後入成均肄業盡交當世名流考取景山官學教習期滿引見以知縣用旋以年老隱居教授一時名士多出其門工各體文尤善詩詞著有鴻雪軒詩文稿民國五年卒年六十有三

民國文苑

劉文田字硯農孤莊頭人事母唯謹與兄弟相友愛宗黨無間言天資穎悟好學不厭尤工書法民國八年七月以中學校畢業生考入直隸第二師範學校國文講習科肄業專精古學詩

文益進畢業後充濟南扶輪小學校教員十年某月感微疾以誤服西藥大汗不解越日而卒同學河間韓汝梅哀其遺稿得詩文集尺牘各一卷

清隱逸

李對字霞表晚號三無老人精於易順治七年圈佔役起與容城孫夏峯先生偕隱蘇門山讀易於聞嘯樓夏峯著讀易大旨多與對商榷夏峯又構兼山堂對爲題聯云兩山相兼土之藏水之潤風之散日之昀氣至化行總是無聲無臭一背自止趾之動腓之隨身之安輔之序事因時起依然何慮何思夏峯嘗有贈三無道人詩云瓦橋老處士來垂衛水綸閉門唯嗜讀混

跡不言貧胸中無機械眉端不蹙顰口底絕雌黃與物唯一真
舉以號三無其不媿古人人孫邵間大易有傳薪我向君問
易君爲我指津君爲我益友況復託良姻君年近古稀少我十
二春命兒多釀酒是夕我作賓山村話終日桃源足避秦觀於
此詩可以想見對之生平矣

馬魯原名之馴字君習父維垣兄之驪皆另有傳之馴爲人有
志氣不苟同於流俗崇禎己卯年二十六鄉舉不售歎曰吾欲
博科名立朝謀國事而今不獲後此時勢日迫恐不及待也素
喜聲氣交接多燕趙高奇士然少許可獨傾服文安紀克揚而
與新城王餘佑王方穀並友善甲申二月提學御史陳純德校

士易州之馴待試殊不作佔畢事潛與素識諸生之豪傑材武者五十餘人爲壇盟易水上相邀入深山爲避秦計盟訖竟歸越一日而賊軍至三月賊陷都城僞官佈州縣五月賊敗傳聞吳三桂借兵復讐還立太子之馴大喜時賊衆狼狽南奔乃號召邑中賓客子弟得士數百人縛僞縣令郝丕績僞教諭劉泰階而立前訓導韓應節掌縣事遣同事武舉劉溶等齎僞雄縣銅契一顆馳送吳三桂以覘情形溶旋持三桂諭帖令官民削髮改衣冠之制之馴乃散遣騎從偕清苑梁以樟兄弟間道南行渡淮謁督撫史可法言事尋渡江居無何見南事不可爲遂遨遊山左卜居諸城縣南九仙山之陽慕魯仲連之義改名魯

黃冠道貌授生徒以自給康熙二十二年癸亥卒年七十無子
門人諸城臧振奇侍藥治喪葬之諸城西南七十里莎溝村所
著有詩一卷文一卷琴譜一卷

龐柄字斗樞平居重然諾喜讀書尤好兵家言精奇門六壬五
行類占諸術人呼爲龐神仙與新城王餘佑交最篤後徙居壽
州東村有田二百畝手種棗千株結茅數間見者呼爲高士其
教以六行爲先六藝次之文爲末一時從其化者甚衆

明藝術

趙律別號漁樵子循之弟也性簡默慈愛居家孝友幼嗜學能
詩後感母疾乃學醫術洞究軒歧之秘以濟人爲心略不責報

尤精太素脈易州霍公名恩註誤失官屬診其脈律曰來春可
辦明後如其言得白除上蔡令過雄復請診之律驚惶不敢對
陰謂其子曰此斬首分骸脈也凶莫甚焉正德辛未果遭流賊
之變夫與婦俱死節律爲詩挽之曰公脈昔曾屬我評已知鐵
漢是天生乾坤祇識綱常重夫婦能將性命輕萬刃斷軀難斷
節千年埋骨不埋名軻山風動蕭蕭木諸是當年罵賊聲

清藝術

趙鳳翔字羽伯別號丹崖子律之曾孫也年二十有文名讀書
會意輒筆記之有廣言觀物聽音紀異四種筆記尤精於易著
易學指掌六卷深有得於京房康節其卜筮故稱神驗又精醫

學梓太素病脈一書書成於鳳翔而名曰漁樵子明祖述律之秘傳也又善畫梅菊草蟲窮鄉閭巷每有疾病無不盡心診視其應如響所著書姚羹湖先生猶及見之惜今無存而趙丹崖之名則猶在人之口云

劉士俊孤莊頭人少習拳勇後遇異僧道濟指授技益精並精楊氏八母梨花槍於戚南塘紀效新書尤所深究縣有巨盜回人百姓者勇武絕人吏莫敢捕士俊單騎搗其巢擒之患遂息咸豐間以技遊京師爲國戚廣公詔所識拔命於正白旗演武廳教練禁旅後隨其徒某宦遊廣東三年復遊京師教練禁旅晚年家居教練子弟多所成就近年北京體育會會長紀德乃

其親炙弟子而上海精武會副會長陳紀平則其再傳弟子也
董憲周字碩甫開口村人幼讀詩書及長喜技擊徧延名師於
家必盡其術而後已藝旣成威名震河朔相從習藝者不下數
百人得其一二卽可爲村坊之保障同治六年馬賊入境鄰村
多被蹂躪是村獨無恙蓋先聲奪人有自來矣憲周性慷慨好
濟人之急遇鄉鄰困乏常出財周之不吝以故人尤德之光緒
十五年冬卒三十一年族人樹碑表其墓

劉乃文原名通以字行孤莊頭人十八歲入邑庠天性孝友侍
母疾衣不解帶者累月兄弟析產擇田宅之薄小者以自與而
以豐厚者歸兄鄉黨稱讓德焉壯歲棄諸生耽玩象奕時以花

鳥自娛客至避不見有請奕者輒倒屣迎之流連晝夜唯恐其速去也遠聞善奕者輒從奚童負碁具裹糧赴之必決勝負而後已遇廟會戲場輒至至則俟舊友僻處角奕暝色至方歸家人問以某會某戲不知也閒居取適情雅趣及韜略玄機橘中秘等碁譜訂其訛謬並自制新譜都爲四百八局成棋式可法一書自爲之序其略云嘗聞弈之爲數小數也爲技雖小其理實深卒爲前驅具百折不回之志馬多曲折有萬變不窮之謀或一打或再打砲之威也或直行或橫行車之勇也士相其衛護也將帥其司令也余不文自幼好習象數迄今五十餘年爰採先正之遺法以爲後學之指南學焉有獲可以爽心可以怡

神卽謂之可以立身也亦宜民國九年八月初四日雄縣野士序十四年夏歷十二月二十四日以疾卒年七十四

李樹園大留鎮人少喜技勇從師習八番拳年二十藝成尤精槍法同治中馬賊擾縣境村人劉文奎王慶元辦鄉團禦賊得樹園之力爲多光緒初留鎮苦梟匪蹂躪樹園憤其凶橫每思自効一日匪至挺長矛擊之殪其二生擒一人與之約曰保無再犯境釋汝匪諾而去卒不復至長子儒珍亦善拳術庚子拳亂作父子同遇害樹園性亢爽尙任俠既習拳勇恒以急人之難自喜其始以此成名卒以及於難三子璞璇宣統乙酉拔貢孫宗弼革命軍參謀長